

■ OR DA LA VITA DA LUDMILLA CAHENZLI 16

Filosofia da jeans isadas

Frust total. Suentar in'odissea tras tuttas stizuns da la citad hai jau pensà ch'jau ha-ja finalmain chattà ellas. Mias jeans novas. In pèr superlessigas jeans che adem-pleschan trais premissas. Jau vegn da ser-rar ellas davanttiers. Ellas cuvran mes tgil schizunt cura ch'jau ses. Ed ellas èn giu-dim betg uschè largias ch'jau ristg in ac-cident.


Jau ma volv davant il spievel en la ca-bina. Ellas fissan perfetgas. Largias avun-da ch'i na fa nagut, sch'ellas van en in zi-chel cun lavar. È stretgas avunda ch'il tgil vesa ora sexy sco quai ch'i tutga. Tuttina crescha la depressiun or da la chautscha, si tras mes pèz, fin siador en ils eglis. Las larmas èn orasum.

I n'è betg il pretsch horrent da 230 francs, lez è er ina catastrofa, ma la gron-da catastrofa è ch'jau na poss nunpussai-vel cumprar la chautscha, malgrà la su-perperfetgamegagaila furma.

La chaussa è ch'ella è isada. En sasez fiss gliez gea flot. Pertge questa jeans ve-san ora sco sch'in cowboy l'avess purtà da chavaltgar duas giadas da Santa Fe tras il Grand Canyon fin en California ed ena-vos. Las sdrimas alvas davanttiers sesan en il dretg lieu. La catastrofa sa chatta da-vostiers. Là hai dus tacs sblatgids che avessan dad esser entamez il tapun. Ma tar mai èn ils tacs plinengiu. U èn mias gautas-tgil forsà memia ensi? En mintga cas vesi or uschè ridicul ch'jau na gughe-gel strusch da pensar tge che mia figlia schess. «Jau na t'enconusch lura per cas betg, sche ti vas enturn uschia. Quai è gea total sper ils chalzers.» Quai fiss pro-babel anc il pli curtaschavel ch'ella schess.

Jau ponderesch da cumprar las chau-tschas e da dar colur ellas. Ma per quest pretsch! Na, Ludmilla. Vai anc! Jau ban-dun la cabina e dun las chautschas a la vendidra. Lezza ma guarda cun tanta compassiun ch'igl è atgnamain malhoffli. Ella è satiglia, ha mettain grondezza 34, ed ha il tgil en il dretg lieu. Jau la pudess stranglar persuentar. Or en l'aria frestga emprov jau da m'imaginar co ch'il tgil da la vendidra vesa or en ventg onns ed hai immediat buna luna. Ludmilla, ma di jau, ti has spargnà ina massa raps cun de-sister da questa cumpra. I fiss pia uras dad ir a prender in café.

Durant baiver café observ jau la glieud che passa davant l'ustaria. Jau



ILLUSTRATURA YVONNE GIENAL
WWW.YVONNE-GIENAL.CH

fatsch cunzunt stim da las jeans che la glieud porta. Mes patratgs daventan filo-sofics. Il mund è sanestrà. Mintg'onn creeschans ils designers novas jeans. Las pli modernas jeans èn adina las pli isadas. La tecnica da sblatgir daventa pli e pli raffinada. Mintg'onn vegnan las jeans fa-bitgidas uschia ch'ellas vesan or a moda anc pli persvadenta sco jeans veglias. E perquai che las jeans da quest onn vesan ora pli veglias che quellas da l'onni passà, ston ins exnum avair las novas. Total pa-radox. Para che la societad da consum, che po trasora cumprar insatge nov, re-senta ina brama per il vegl, per l'isà, per valurs constantas. Betg da smirvegliar. Il temp sa mida uschè svelto ch'il carstgaun tschertga almain en las jeans valurs per-petnas, u almain uschè perpetnas sco las jeans dal cowboy ch'è chavaltgà da Santa Fe fin en California e che ha mai stgamià chautschas. Forsa n'ha el gnanca lavà el-las. Geabain, talas valurs tschertga nossa societad!

Per fortuna n'hai jau, Ludmilla Ca-henzli, betg tals basegns. Jau stun sur la chaussa. Jau na ma lasch betg turmentar dal chatsch sturn da consum. Jau desist da cumpras vanas, pertge ch'jau hai gea a chasa plunas da jeans isadas.

Ina dunna da mia posa s'avischina a l'ustaria. Ella ha mia postura. Ella porta jeans. Las jeans vesan ora bain, almain davanttiers. Probabel vesan ellas ora da davosen uschè catastrofal sco quellas ch'jau hai empruvà ansant.

Jau sbass mia egliada, fin che la dunna è passada sperasvi. Lura guard jau suen-ter ad ella. Uau! Perfetg. Lavadas ora sco sch'ella purtass questas chautschas gia dapi decennis. Classa! Exact da quellas stoss jau er avair!

Il cudesch pon ins retrair online tar Lia Rumantscha www.liarumantscha.ch (http://www.liarumantscha.ch/sites/content/online_shop.html?shop:view=details&shop:productid=2830) u tar mintga libreria